



(khas bagi Majalah Qalam - tidak dibenarkan dikutip)

## Saat Doa Makbul

### Pada Hari Jumaat

Aḥmad bin Ḥāji Ṭaib, Teluk Anson Perak, bertanya:

Menurut yang masyhur diketahui bahawa pada hari Jumaat ada suatu saat atau ketika yang sangat makbul doa di dalamnya, harap tuan terangkan adakah saat itu sebelum sembahyang Jumaat atau kemudian daripada itu?

Jawab: Saat yang baik ini ada tersebut di dalam beberapa hadis Nabi (SAW) ada hadis yang menerangkan dengan cara am yakni tidak diterangkan adakah ia pada waktu pagi atau pada tengahari. Ataupun selepas itu. Tetapi ada pula hadis yang mengatakan waktunya selepas asar sehingga matahari tenggelam.

Lebih jelasnya, kita turunkan di bawah ini tiga hadis berkenaan masalah ini:

*'An Abī Hurayrah raḍī Allāh 'anhu qāla, qāla Rasūlullāh ṣallā Allāh 'alaihi wa sallam inna fī al-jumu'ah lisa'at la yuwāfiqūhā Muslim wa huwa qā'im yuṣallī yas'alu Allāh 'Azza wa Jalla khairān illa a'ṭāhu Allāh Ta'ālā iyyāhu . . . Rawāhu al-Jamā'ah.*

Ertinya: Rasulullah (S.A.W) bersabda, bahawa pada hari Juma'at ada suatu saat, tiada seorang Muslim menepatinya ketika ia berdiri sembahyang lalu ia bermohon kepada Allah 'Azza wa Jalla akan perkara yang baik melainkan Allah Ta'ālā mengurniakan permintaannya itu . . . ."

Meskipun hadis di atas tidak menerangkan masanya

Peringatan:

Pertanyaan-pertanyaan yang tidak disertakan tanda tangan dan alamatnya yang terang tidak diraikan. Juga pertanyaan-pertanyaan yang mengenai di sekeliling hal ehwal masyarakat kita itulah yang diutamakan daripada soal yang sulit-sulit dan jarang berlaku oleh kerana ruangan ini adalah bergunajuga untuk panduan pembaca-pembaca.

tetapi hadis yang di bawah ini menerangkan saat itu ialah

lepas asar:

*Wa 'an Abī Sa'īd wa Abī Hurayrah raḍī Allāh 'anhumā anna al-Nabiyyu ṣallā Allāh 'alaihi wa sallam qāla: Inna fī al-jumu'ah lisa'at la yuwāfiqūhā 'abdu Muslim yas'alu Allāh 'Azza wa Jalla fihā khairān illa a'ṭāhu iyyāhu, Wa hiya ba'da al-'aṣr. Rawāhu Aḥmad.*

Ertinya: "Rasulullah (S.A.W) bersabda: Bahawasanya pada hari Jumaat ada suatu saat, tiada seorang Muslim menepatinya lalu bermohon di dalamnya kepada Allah 'Azza wa Jalla akan perkara yang baik melainkan ia diberikan permintaannya itu saat itu ialah lepas asar".

Lagi suatu hadis sahih:

*'An Jābir raḍī Allāh 'anhu, 'ani al-Nabiyyu ṣallā Allāh 'alaihi wa sallam, qāla: Yawm al-Jumu'ah ithnatā 'asharah sā'ah minhā sā'ah lā yūjad 'abd Muslim yas'alu Allāh Ta'ālā shaynā illa atāhu iyyāhu, wa iltamasūhā Akhir sā'ah ba'da al-'aṣr. Rawāhu al-Nasā'ī wa Abū Dāwūd.*

Ertinya: "Nabi (SAW) bersabda: hari Jumaat itu 12 saat di antaranya suatu saat tiada didapati seorang Muslim yang bermohon kepada Allah Ta'ālā melainkan diberikan kepadanya apa yang dipintanya itu, carilah dia (saat yang baik itu) pada saat yang akhir lepas Asar".

Menurut ahli-ahli hadis bahawa hadis-hadis yang menerangkan saat itu jatuh pada waktu asar sehingga matahari masuk itulah yang lebih kuat atau lebih rajih.

Sayogia diingat doa yang makbul (yang diperkenankan oleh Tuhan) itu bukan sahaja bergantung kepada saat yang

baik tetapi kepada cara berdoa iaitu dengan hati yang ikhlas lagi khusyu' dan orang yang berdoa itu hendaklah taat setia mengerjakan perintah Tuhan dan menjauhkan larangan-Nya.

### Anak Cina

'Umar Hussain, Klang bertanya: Apa hukumnya anak Cina (Musyrik) yang dipelihara oleh orang Islam dari kecilnya tiba-tiba mati sebelum baligh, bolehkah ditanam secara Islam?

Jawab: Wajib ditanam secara Islam, kerana semua kanak-kanak – anak Islam atau anak kafir – yang belum baligh masih bersih; tidak menanggung dosa seperti yang diterangkan oleh hadis sahih:

*“Mā min mawlūd illa yūlad ‘alā al-ḥiṭrah, fa abawāhu yuhawwidānihi aw yunaṣṣirānihi aw . . . .”* (R. al-Bukhārī wa Muslim)

Ertinya: “Tidak seorang anak pun melainkan diperanakkan atas kesucian semulajadi, maka ibu bapalah yang meyahudikannya atau menasranikannya atau memajusikannya . . . .”

Nyata di dalam hadis ini tidak dibezakan di antara kanak-kanak Islam atau kanak-kanak kafir. Lebih jelas lagi seperti yang tersebut di dalam hadis yang sebuah lagi ini:

*“‘An Samrah, ‘an al-Nabiyyu ṣallā Allāh ‘alaihi wa sallam, qāla: Kullu mawlūd yūlad ‘alā al-ḥiṭrah, fanādahu al-nās: Ya Rasulullāh wa awlād al-mushrikīn? Qāla: Wa awlād al-mushrikīn”.* (R. Abū Bakr al-Barqānī)

Ertinya: Daripada Samrah, daripada Nabi (S.A.W) sabdanya: “Tiap-tiap anak diperanakkan atas kesucian semulajadi” Sahabat-sahabat pun bertanya: “Ya Rasulullah? Adakah anak-anak musyrik demikian juga?” Nabi menjawab: dan anak-anak musyrik

demikian juga!”

lebih tegas lagi hadis “Hasan” yang diriwayatkan oleh Imam Ahmad ini:

*“‘An Khansā’ binti Mu‘āwiyah bin Ṣarīm ‘an ‘ammaturah qālat qultu: Ya Rasulullāh man fī al-jannah? Qāla: Al-Nabiyyu fī al-jannah wa al-shahīd fī al-jannah wa al-mawlūd fī al-jannah”.*

Ertinya: “Daripada Khansā binti Mu‘āwiyah bin Ṣarīm daripada ibu saudaranya, katanya: Aku pernah bertanya: Ya Rasulullah! Siapakah dalam syurga?” Lalu Nabi menjawab: “Nabi di dalam syurga, orang yang mati syahid di dalam syurga, dan kanak-kanak di dalam syurga.”

Setelah jelas bahawa kanak-kanak musyrik itu bersih daripada dosa dan tempatnya di dalam syurga, maka kanak-kanak musyrik yang dipelihara oleh orang-orang Islam wajib diurus secara Islam apakala ia meninggal dunia sama seperti kanak-kanak Islam sendiri, yakni disembahyangkan dan dikuburkan dalam perkuburan Islam.

---

Sambungan dari muka 5

jalan beragama kerana dengan membuka akal dan fikiran itulah sahaja dapat menguatkan perdirian dan keyakinan mereka. Dengan itu sahajalah nanti, jika diusahakan, kita akan melihat pemuda-pemuda Islam tidak gentar menghadapi maut, menghadapi atom bom kerana memperjuangkan kalimah Allah *Hiya al-‘Ulyā* dan mempunyai keyakinan yang tidak berganjak bahawa hidup dan mati mereka adalah semata-mata kerana mencari keredhaan Allah!

Wahai ulama! insafilah – janganlah kita menghabiskan masa kita dalam masalah-masalah itu sahaja sedang tanggungan menyakinkan pemuda-pemuda kita kepada Allah terbiar. Mudah-mudahan Allah memberi tawfiq dan hidayah kepada kita bersama untuk menegakkan kemuliaan agama kita – Amin.